

永平府志卷六十

列傳十二

行誼一

金

齊陶其先宏正人高祖文及仕鄭州防禦使後徙石城
再徙馬城樂安鎮兄甫舉進士未仕卒陶於遼壽隆
閒監樂安鎮酒務善幹辦金天會閒授明威將軍階
三級僕馬萬餘而厭侈靡崇節儉孝友慈惠動以禮
法律身鄉閭翕然稱之長子執中官修武校尉仲子
允中忠顯校尉俱恭謹世其行

按灤志云壽昌閒徵授石城令壽昌當是

壽隆
之譌

吉士寬尹吉甫裔也南漢太守格之後五代徙居灤州
宜安里事親最孝富而好施贈昭勇大將軍

(元)

葛宏灤州人金末歲饑竭力贍卹全活數百人元辟爲

石城縣尹

王振平灤人居喪廬墓

梁訥永平人居喪廬墓

以上二人俱見
元史孝友傳序

龐遵盧龍人母病腫三年不能起思食魚遵求於市不

得歸途歎恨忽有鯉躍入其舟作羹以獻母悅病痊

元史附胡
光遠傳

李彥忠廬龍人性至孝父喪廬墓八年足跡不至家至

治中旌表

元史附邵敬祖傳畿輔志作宏治中誤

任伯仁灤州人南麓六世孫讓產於弟伯義伯禮孝友

出至性元貞中授銀符進義副尉武魏親軍百夫長

案元史百官志進義副尉從八品又按將軍有武節武德武義武略之稱無武魏者俟再考

路進興字通舉灤州人大德間隨伯顏破賊不避矢石

累獲大功受勅牒印綬賜敦武校尉辭歸奉母務盡

菽水之歡母卒餽粥縞素哀毀踰禮鄉人以孝稱焉

〔明〕

杜仁義樂亭人洪武間與妻韓氏俱以孝旌

見明史孝義傳序

韓孝子舊志失名樂亭人居鄉廉讓與人無競竭力以

奉親洪武間題旌

邑侯陳金駿兩孝子傳云余閱邑志見有兩孝子一爲黃孝子一爲

韓孝子黃孝子名贊江西臨江人父均道於元延祐間求仕京師留贊江南時贊幼及長聞父再娶居永平乃往省之則父已歿其婦挾貲更嫁居樂亭贊往求見拒不納贊曰吾來省父不幸父歿幸示墓所得奉骨歸足矣忍利遺財耶母竟不見其母弟憐之與偕求墓所又不得贊日夜悲哭禱於神一夕夢一老人以杖指葬處曰見片輒卽可得明日卽其地求之母弟曰是矣某物可驗啟棺負父骨歸嗚呼孝矣昔朱壽昌棄官入秦尋母與家人訣曰誓不見母不復還行次通州得焉與此差相類而壽昌迎養終身贊祇負骨以歸豈孝子之遇有幸有不幸也抑天之待孝子各成其是耶越至有明又有韓孝子者里居不著名字弗傳府志云明洪武錄載有旌表樂亭韓孝子語想已登國史矣縣軼其名惜哉觀此數語其孝必有大過人者矣不然何以入一代實錄中耶夫黃猶紀其事而韓竟失其名此孝子不幸中之尤不幸

者也雖然孝庸行也率於性之自然而根於心之所不容已其極至於明天察地幽感鬼神祇以求愜其隱衷而非有所表暴於世故其若隱若見亦聽乎遇之適然若兩孝子者是也究之紀其事者孝傳失其名者孝亦傳則雖影響昧昧而至德休聲已昭然揭日月而行余故援筆以紀之俾樂邑士民之讀是編者並誌兩孝子心而由能動其天下之感則孝子之風且與平山灤水而俱長矣

麴祥字景德永平人永樂中父亮爲金山衛百戶祥年

十四被倭掠國王知爲中國人召侍左右改名元貴

遂仕其國有妻子然心未嘗一日忘中國也屢諷王

入貢宣德中與使臣偕來上疏言臣夙遭俘掠抱鬻

痛心流離困頓艱苦萬狀今獲生還中國夫豈由人

伏乞賜歸侍養不勝至願天子方懷柔遠人不從其

請但許給驛暫歸仍還本國祥抵家獨其母在不能
識曰果吾兒則耳陰有赤痣驗之信抱持痛哭未幾
別去至日本啟以帝意國王允之仍令入貢祥乃復
申前請詔許襲職歸養母子相失二十年又有華夷
之限竟得遂其初志聞者異之

明史

秦良永平人成化閒以孝旌

與下朱輝名俱見明史孝義傳序

朱輝廬龍人庠生母程氏亡晝夜號泣哀毀骨立廬墓
負土成冢及期白狼馴擾不去有燕來朝穀雙歧之
異撫院給近墳山場環五里許官爲植樹成化甲辰
題旌以歲貢爲任邛訓導

侯顯昌黎人國學生尙氣節敦樸素父母亡俱廬墓側

鳩巢于舍芝生干冢

名見明史
孝義傳序

楊騰遷安人諸生幼孤母病目以舌舐之而愈及歿廬

墓三年有冰花結於盆儼如樹下人拜伏墳前之象

已而芝草生焉隆慶中上聞詔立純孝格天華表於

通衢仍給冠帶榮之

名見明史
孝義傳序

韓瑛遷安人廬母墓三年日哀痛覆土三次母墓成邛

深山獨處有虎衛之冬產瑞芝詔立孝感坊同邑蔣

盛廬父墓三年亦詔旌表其閭

名俱見明史
孝義傳序

穆大任山海人庠生至性純篤父早逝事母以孝聞母

永平府志 卷之一
四
歿廬墓值兵變鄉人居村落者皆入城避亂大任獨
守墓不忍去

田紳樂亭人庠生景泰初以親老陳情於督學使者求
侍養父歿哀毀踰禮既葬跣足負土母終亦如之封
土巍然可望數里有司請旌未果

楊珍撫甯人母早逝事父惟謹侍食侍寢積久不怠內
外咸以孝子呼之父疾篤口嘗其便知不能起遂治
後事如禮及葬廬墓側三年

袁卉撫甯人素敦孝行母蚤逝及父歿廬於墓側三年
蛇馴蓐次地湧甘泉共稱孝感

金鏞撫甯人庠生父禧早逝母高氏守志撫孤鏞負米採薪勤於供養母有疾恆焚香祝天願以身代進食必先嘗其寒熱由恩選官光祿寺署正乞歸終養母節子孝萃於一門

王淵廬龍人幼喪父其母陳氏守節至七十餘卒淵廬墓三年日三抔土高冢巍然時其邑人朱國賢宋德昭蕭大用俱親喪廬墓有司獎之

安民字修己灤州人宏治己酉舉人授兵部司務歷戶部郎中引疾乞休加四品服色初父和尹大同卒於官民幼扶櫬還事母周氏曲盡懽愉母卒廬墓三年

未嘗入內鄉人稱孝焉

案舊志安民安尙灤州人巡撫汪玉贈扁曰友于之門疑

安民卽

是此人

張雲鵬山海衛人父病湯藥親嘗夜不假寐父歿廬墓

三年

趙文舉山海衛人幼極孝母患疽痛不可忍醫皆云不

治舉禱於天母獲痊家素窘居常奉母甘旨不缺卽

富者不能過云

蕭韶鳳山海衛人年十九父病蠱迎醫視之曰得樟

木根可愈城中求之不獲或告以產於海陽時石河

水暴漲不可渡韶直前往覓家人止之泣曰父病篤

阻水而止於心忍乎竟涉至中流溺死三日屍浮於海君子重其孝而哀其愚

張懋勳山海衛人都督世忠子也痛父歿於王事每語及輒流涕事孀母三十餘年孝養備至母卒哀毀骨立廬墓如禮

馮恩孚樂亭人嘉靖壬子歲貢生性至孝有老萊風母性嚴孚先意承志務得親歡待人亦謙和無忤鄉里稱之

張自鎬樂亭人萬厯戊寅歲貢生性謹厚事親最孝母多任性鎬每幾諫父亦感悟

孫渤昌黎人幼喪父事母最孝母死廬墓哀毀如禮
傅夢良山海人庠生性純篤母歿哀毀骨立旣葬廬墓
側夏秋霖雨廬中水盈尺不爲動

王克勤灤州人庠生事繼母以孝聞萬厯十三年學按
兩獎其閭

劉文煥字世英樂亭人幼孤事母孝妻盧氏亦孝於姑
姑病籲天請代冬著單衣三年病果痊姑歿欲廬墓
文煥止之曰此爲子事也自廬墓三年每日覆土者
三墳可望數里嘗鑿井於墓旁汲以自爨不數尺泉
水湧出人號爲孝子泉云

任自永遷安人生三歲而孤母郭氏撫之成立永事母以孝聞及歿哀毀踰禮既殯廬於墓朝夕哭奠三年如一日

楊有成撫甯人庠生八歲喪父已知哀毀及母卒槩水不入口既葬廬墓側茹蔬啜粥負土築墳日三哭奠歷寒暑不輟遇邊警亦不少動舊有枯松復活烏巢其上人謂純孝所致同邑孫國賢後亦以廬墓得旌穆思文山海人庠生事繼母孝有二弟俱繼母出財產必均後二弟家窘又爲弟子給產婚娶督學王應元疏請建孝義坊

王士倜山海人庠生天性孝友父從政令萊陽以持正
忤當事被誣繫獄倜偕弟偉搥登聞鼓劾頸力救卒
白父冤

張廷佐遷安人庠生性至孝父疾不解衣帶者五旬餘
又失明佐禱神以舌舐之愈及歿夜依柩側風雨不
避奉母終身孝養彌至

馬麟盧龍人景泰三年灤水壞田民多流亡輸粟八百
石助賑詔旌其門時同邑呂信遷安宋會董全周清
楊玘撫甯許敬昌黎高信興才震樂亭姚清徐俊石
敬俱捐粟八百石助賑事聞詔旌所居曰尙義之門

翟吳撫甯人天性溫厚與物恂恂人有侮者受而不報
遇顛連疾苦者常解衣推食以周之祀鄉賢

謝福灤州人天順五年旌之曰尙義

吳思文灤州人輸粟救荒成化五年詔賜七品散官

徐禮灤州人成化間隆冬時施衣每歲行之不倦人懷
其惠

李福灤州人於成化七年爲義葬凡不能葬者舉之

王信撫甯衛人進士王印祥之祖也成化七年大饑出
粟八百石賑饑萬厯間歲荒邑人郭純學亦捐米助
賑本縣旌其門

王天相撫甯人好施樂善不遺餘力本縣旌之同縣馮
守業高鑑王一介皆以輸粟救荒周貧濟乏鄉里稱
長者

楊念撫甯人治家嚴肅一門雍睦七世同居

徐霖撫甯人生平積德以寬忍爲務邦大夫高其行誼
給授冠帶三子九孫無白丁

黃應科撫甯人性喜施舍族人黃大領家貧轉徙失業
科招之回里給田一百二十畝養之

鍾鉞撫甯人孝友倜儻有大節扁旌曰行孚月旦

馮餘慶灤州人由明經授西華令捐資千金建長橋於

治郭以利涉歸施義田用濟貧族以孫運泰貴贈岡卿

劉甫樂亭人自明初至宏治閒六世同居凡內外婚葬禮儀必均人無後言已未巡按御史張黼嘉其賢命

知縣田登旌其廬

樂志作劉本祥恐是一人

劉會灤州人嘉靖十六年輸粟一千石賑饑時州人吳鎮亦捐穀賑饑恩賜六品壽官

高漢樂亭人六世同居嘉靖十六年知府劉隅獎之

王榮遷安人由明經任榆林訓導未幾乞休居鄉友睦嘗買人田人不忍舍輒毀券無難色